

٢٥- (وَكَيْفَ تَصْبِرُ عَلَىٰ مَا لَمْ تُحِطْ بِهِ خُبْرًا) إذا كان سيدنا

موسى مصبرش على إنه ميعرفش الحكمه ..إنت هتعرف

تصبر؟

فرق كبير في نوعية الصبر اللي مطلوبه من سيدنا موسى

واللي مطلوبه منك

أولاً:

سيدنا موسى مصاحب شخص معاه الجواب بتاع كل فعل

لحظي بيتعمل ..

بالظبط كأنك في إمتحان وموزعين عليك ورقة الأسئلة وفي

ظهرها فيه الإجابة ..

نسبة الفضول عندك أزيد بمراحل إنك تبص على الإجابة

أكثر من إللي مش معاه الإجابات !

ثانياً:

سيدنا موسى مستتكر، مستغرب ..لكن يقينه وثقته متهزتش

بالدليل، إعتذاره بعد كل إستتكار ..

(قَالَ لَا تُؤَاخِذْنِي بِمَا نَسِيتُ وَلَا تُرْهِقْنِي مِنْ أَمْرِي عَسْرًا)

(قَالَ إِنَّ سَأَلْتُكَ عَنْ شَيْءٍ بَعْدَهَا فَلَا تُصَاحِبْنِي ۖ قَدْ بَلَغْتَ مِنْ لَدُنِّي عُذْرًا)

ثالثاً:

كان هدفه من البدايه .. طلبه العلم(هَلْ أَتَّبِعُكَ عَلَىٰ أَنْ تُعَلِّمَنِ مِمَّا عُلِّمْتَ رُشْدًا)

فعدم صبره .. دافعه العلم و تعلم الرشد ..

لكن ..

عدم صبرنا إحنا مختلف تماماً .. دافعه الخفي وبأكد على خفي ..
بيكون نابع من عدم ثقة ويقين تام في مقدرات الله بينتج عنه
عدم إقتناع!

وخاصة لو حاجات بتحصل متافيه مع مفاهيمك إنت
وقدراتك إنت ..

وخاصة إللي تتنافى مع فهمك للرحمه ..والعدل !

ودول أكثر ميزانين بيوجعوك أوي لما يحصل ليهم مساس
عندك أو عند غيرك ..

وتستشعر من جواك بأن الرحمة ناقصة والعدالة مش مكتمله!

هي دي الطبيعه البشريه.. بتدور دايماً على مسبب لكل
سبب، على مبرر لكل فعل ..

وده كان لازم يكون فيك وإلا مكنتش وصلت لفكرة إن في خالق
هو مسبب كل الأسباب .. فطبيعتك إنك باحث طول الوقت هو
إللي بيوصلك لمعرفة الله!

فدايماً جواك سؤال..

حصل كده ليه ؟

بيحصل كده ليه؟

الحكمه من كده إيه؟

ربنا حب يطمنك و جبهالك في رسايل قصة سيدنا موسى
..إنت يا إنسان نازل في تكوينك البحث عن إجابته ،

إجابته تقنعك ، تفهمك ، تفك الألغاز!

ربنا مقدرّ تعبك وحيرتك من تركيبتك دي إللي ملكش يد
فيها..

علشان كده ربنا بعثلك نماذج لبعض الإجابات لبعض المصايب
والمقدرات الخفيه وإللي صعب تيجي على بالك وتستوعبها..

فكانت قصة السفينة والغلام والجدار ..

الحل إيه ؟

الصبر!

مش بعرف أصبر.. هو بالساهل كده ؟!

علشان تطبقه محتاج ٦ حاجات:

١ . تعترف إن دي طبيعتك وده منطقي إنك تسأل

٢ . في أسئله .. عقلك البشري مش في قدراته إستيعابها .. فبتتهكّه فقط

٣ . عليّ يقينك أوي وثقتك في كل صفات الله

بمعنى .. الله رحيم .. يعني مفيش أرحم منه إطلاقاً، يعني إنت
مش أرحم منه على نفسك وغيرك بأي حال من الأحوال!

وقيس على كده .. فكل الحكايه إنت مش مستوعب وقدارتك
مش جايبة كل ده

٤ . عدل الله بيطبّق كمنظومه شامله .. فلو بيحصلك أمر بالنسبه
لك ظلم .. فكمنظومه عامه ده أعدل شيء، لكن إنت مش
مطلّع على كل الجوانب وبما فيها . وضعك إنت بعدين !

٥ . متركزش كثير مع أمر ملكش يد فيه خلصت أسبابه ،إنشغل في أمور لك يد فيها وإلا ممكن عمرك كله ينسحب في هم وغم ويحث وتدوير على إجابة مش أوانها تعرفها ..

٦ . فكَرْ نَفْسَكَ إِنْ الْعَمْرَ بِيَخْلُصَ أَسْرَعُ مِمَّا بِنَعْمَلِ حَسَابِنَا ،بنستبعد الموت وهو قريب ..
هتلاقي نفسك أذكى من إنك تضيع وقتك ..

حاجة أخيرة لفتت نظري :

(فَوَجَدَا عَبْدًا مِّنْ عِبَادِنَا آتَيْنَاهُ رَحْمَةً مِّنْ عِنْدِنَا وَعَلَّمْنَاهُ مِمَّنْ
لَّدُنَّا عِلْمًا)

آتيناه رحمه من عندنا!

ربنا إختص صفة الرحمه علشان يطمئنك إن كل فعل مهما كان ظاهره آلم .. ففي باطنه رحمه ..

اللهم أرزقنا الصبر والبصيره واليقين بالله والتسليم

